

非漢人所書今丈尺里數皆為時書也不但刻劃五嶽諸名山亦然則山之獨高處爾今書是臣朔所具見其王母所道諸靈最為所不履唯書中夏之名山爾臣先師谷希子者太上真官也昔授臣崑崙鐘山蓬萊山及神州真形圖昔來入漢留以寄知故人此書又尤重於嶽形圖矣昔也傳授年限正同爾陛下好道思微孰心內向天尊下降並傳授寶秘臣朔區區亦何嫌惜而不上所有哉然術家幽其事道法松其師術則事多疑師願則妙理散願且勿宜臣之意也武帝欣聞至說明年遂復從受諸真形圖常帶之肘後八節常朝拜靈書以書求度脫焉朔謂滑稽逆知預觀帝心故弄萬乘傲公侯不可得而師友不可得而喜怒故武帝不能盡至理於此人矣

十洲記

洞天福地嶽瀆名山記序

乾坤既闢清濁肇分融為江河結為山嶽或上配辰宿或下藏洞天皆大聖工真主宰其事則有靈宮閣府玉宇金臺或結氣所成疑雲虛構或瑤池翠沼流注於四隅或珠樹瓊林扶疎於其上神鳳飛虬之所產天驕澤馬之所棲或日馭所經或星躔所屬舍藏風雨蘊畜雲雷為天地之關樞為陰陽之機軸乍標華於海上或迴踈於天中或弱水之所繫或洪濤之所隔或日景所不照人跡所不及皆具經秘冊叙而載焉太史公云大荒之內名山五千其間五嶽作鎮十山為佐又龜山玉經云大天之內有洞天三十六別有日月星辰靈仙官闕主御罪福典錄死生有高真所居仙王所理又有海外五嶽三島十洲三十六靖廬七十二福地二十四化四鎮諸山今總一卷用傳好事之士其有官城處所得道姓名洞府主張仙曹品秩事條繁廣不可備書聊紀所管郡縣及仙壇官觀大數而已天復辛酉八月四日癸未華頂羽人杜光庭

於成都玉局編錄